

四庫全書

集部

欽定四庫全書

集部

鶴山集卷四十三

詳校官庶吉士臣張溥

主事臣呂雲棟覆勘

總校官檢討臣何思鈞

校對官主事臣陳墉

謄錄監生臣倪承彥

欽定四庫全書

鶴山集卷四十三

宋魏了翁撰

記

海州太守題名壁記

海之為州東略巨浸南限長淮西北鄰徐兗沂密嘉定
十有一年始建城市再營宮室徐君晞稷由山陽通守
往涖州事秩滿代去今守侯君忠信復還定而振業之
百廢具舉遺黎屬心詔增秩加職以寵綏之守樂民之

和侈上之賜也伐石泗濱以識郡之興復與嗣守者姓名將寘之壁帶而求文于了翁因為稽諸圖牒蓋自梁武末年長江以北悉入後魏武定七年改青冀二州及海州高齊文宣帝移海州治琅邪郡改琅邪為朐山隋末喪亂臧君相竊據之武德四年君相以郡歸順又改海州自入國朝毋改也而中興百年間離合去來之靡常則使人重有感焉易曰天險不可升也地險山川丘陵也王公設險以守其國夫所謂地險則易旣指言其

為山川丘陵矣而獨不名天險為何物王公所設者何
事愚謂盈宇宙間截然有等級之辨不城而不可踰不
兵而不可犯此天險也昔之人以大師為垣以得道為
助以在德為險以禮義廉恥為城皆是物也盛服以禦
盜憤坐以受使長嘯以却兵單騎以見敵則是物之効
也夫苟不明乎是而專以城郭兵粟為山川丘陵之守
則寧怪夫離合去來之無常也敢併以復于侯其勒諸
石與來者共守焉

興元府新作張魏公虞雍公祠堂記

先皇帝二十有六年詔以武階丁侯煇為梁州牧其明年侯居母喪申詔奪服不可服除詔還鎮侯既大城漢中以塢其民比再至慨然曰嗚呼昔吾有先正如魏忠獻張公雍忠肅虞公不嘗經略此土乎乃作室於天申浮屠之居而肖貌之以書來曰二公立德勤命在旂常鼎彝匪我邊陲所敢私也顧其有績是邦則滋不可勿祠子為我書之某不佞幸嘗有私淑志若忠獻公之年

行則既譜之矣忠肅公則傳之二公之奏疏則又嘗所
次第而序之者也知之宜莫如某詳具忠獻始為士曹
力辭筦庫忠肅不屑餉屬姑就魚關之辟蓋自為小官
進退皆有風則邦人至於今道之迄由樞宰先後奉使
聲震關陝力遮梁益以保我子孫黎民然則漢中誠不可
勿祠又可無記乎國家自熙寧以來釀成寇禍于時鉅
人元夫尚有存者故公論未泯以啟元祐之隆乎紹聖
而後羣儉用事極於崇觀政宣之季潰裂四出於是士

大夫不曰和親則曰逃避迨屬車蒙塵而後呿口頓足則已無及然而既委三鎮又失太原自餘諸城人心未携猶以死拒也士大夫既悟和親之失則爭為逃避之計於是而後失河南北失京東西維揚以來禍變益慘蓋皆建炎以後不知平時所講何事而且必行至此時惟忠獻公獨倡大義復明辟而夷二凶當戎行以殄劇寇內變粗定則首以身任西事於是人始知我猶可以國而寇不足多畏也相與盡力惟愜是敵七年之間吳

張韓岳諸人勝于白店原于四明于太湖于和尚原于
殺金平于大儀于藕塘則建炎三四年以前所未有而
公實倡之也陝服喪師淮西逆命人以咎公不知金入
中原以來不戰而潰不守而棄未嘗敢有抗之者而樊
率諸將仗義復讎則自公始尼堪既死劉豫旋廢金歸
我河南陝西之地此一幾也而苟得幸安者方以南自
南北自北之說給取相位烏珠背盟順昌柘臯之勝敵
氣頓索此又一幾也而僅畫淮漢以與議和由是養癰

蓄禍凡二十餘年以開金亮之侮亮雖兇暴而違天咈
人人知必亡乃自絕淮以來諸鎮斂兵以避沿江荷擔
而立朝臣徙家相屬督府遣屬不行時惟忠肅公首任
采石之戰以摧敵鋒又遏瓜州之萌以激亮弊於是我
始能以敵國抗金蓋二公之見于事變者章章若此雖
然其所建立則不止是雖前後迭出而正國救民之心
之死靡他則若合符節今其僅可見忠獻六百餘疏忠
肅二百餘疏大抵惟正人心寬民力討軍實致人才之

為務軋軋忠憤百挫不折至所謂不當棄地還俘則又
皆以表臣抗廷論以孤忠破羣慝然則人孰無仁義之
心也利欲之陷以失之而二公則循吾本心焉耳成敗
利鈍不皇卹也彼不吾以者鈞是心也而因禍福為利
乘間售私則孟子所謂無惻隱羞惡是非辭讓之心而
非人者也二公經綸昉于漢中而事業著見亦多在漢
中敢併以是復于丁侯將刻諸麗牲之石豈惟慰桐鄉
峴首之思抑亦熄邪說正人心之一助云

天台張氏

端甫雙壁樓記

天台二張府君端甫字相之端友字直之以孝友行于家以疎財急義聞于州閭天官葉公時為識其墓起居鄭公又叙而銘之公卿大夫士為詞以悼之宗族鄉黨相與述其事而弔之其孤夢錫緝為巨編復求文於余余觀夢錫檢履醇固若有志乎為己之學則記所謂如執玉如捧盈如弗勝如將失之使國人願稱焉斯其為顯揚不已多乎而必以名士銘誄為榮也夢錫曰吾聞

一家仁一國與仁一家讓一國興讓是書也亦庶幾仁讓之勸匪直為二父榮也余乃為詩以贈之曰靜將物理驗良知父母恩深報答微羣動芸芸覘夜息萬生點點是春暉錯居宇宙猶同氣況此根心貫一機理道坦然人莫究是家兄弟庶全歸夢錫泣數行下曰必子也知我父子者吾將為樓于閣廬之側而榜以雙壁子更為我發之余方論次其事或以語余曰先王制禮其遠近降殺之節使過者可俯就不至焉者可企及父母之

喪三年而忌日不樂父母之服齊斬而兄弟期哀言有稱也毀而死君子謂之無子而今也弟以追遠而亡兄以喪弟而卒白首同氣而旬月之間咸絕厥命乃無過於禮乎曰不然也禮壞俗薄喪不能三年憂況忌日乎親喪不致毀況兄弟乎吾以為厚人倫篤天性將扶世以厲俗者殆有激於二士也而過之云乎雖然吾前所謂如執玉如奉盈如弗勝如將失之者此在夢錫不可以不思也夢錫曰唯遂書以為記

潭州惠民倉記

嘉定之季年潭州守臣真德秀言所領州生齒阜蓄地力不足以給率仰穀于商舟舟至之不時則上下狼狽雖有常平義倉之蓄而令非凶歲毋發也顧守地于斯使民盼盼然無以穀其腹教惡乎施臣竊見淳化中張詠守成都以市估準田稅使民歲輸米于官明年春藉城中之民糴以元直其後王曉韓億父子文彥博胡宗愈諸賢又相與脩其法而守之至於今不能易臣嘗眎

諸故府有秋稅米合正耗凡五萬餘石石出錢四千二百以給郡用臣請得如成都故事斷自嘉定十六年使民輸米貯之別倉榜曰惠民蠲槩量之贏罷轉輸之費較以輸泉輕重略等於公家既無損而糴之日自二月訖七月正新陳未接民苦貴糴而計口給券視時直加損焉則於一城生聚為利甚博況又什其民以相保受有麗於罰則毀券住糴保受者同之蓋非特穀之也哉又將使休戚察其奇衰而教寓焉既又疏其事以上于

尚書而以時屬記於某曰是職分當然毋庸書然吾患
來者之不吾悉而莫我繼也某慨然曰公無患焉仁義
之心豈獨賢者有之而他人不然也在易之臨澤上有
地其象曰君子以教思無窮容保民无疆夫地臨澤上
切近而相滋君子臨民之象也君子之於民類也而出
乎類以長之苟是心之常存則爾過予責爾疴予恫其
欲教訓而容保之也疊疊乎洋洋乎有自不可已者吾
將見是法之行人心所同有推行而無沮撓有變通而

無改更也又將見仁遜之興爭訟之息自是法始民惟
恐法之不久也而誰以易之或者不過曰郡少府之仰
給于泉其來已久不知以粟易泉固無乏於供也輸泉
始冬而盡春夏粟之期會亦莫不然其或糶未竟而去
官則粟亦泉也古人論事惟義之是否而利害所不可
計今始以利害計之則亦見其為利爾僕蜀人也嘗仕
於成都於忠定之法蓋身履目擊之閱襁二百莫之有
改則以考諸義而叶雖千載一心也公何患焉公名某

字希元建安人以正學直道歷中外幾二十年其守潭也崇社修學復稅酒興社倉營義冢行和糴米建賑惠局凡以利民者無不為也敢併記之以穀來者

道州寧遠縣新建濂溪周元公祠堂記

嘉定九年某奉使東川為濂溪周先生河南二程先生請所以易其名者詔下如章十有五年某召還道九江謁周先生故宅以元公之命書告後二年道州寧遠令黃大明以書來曰吾聞古之鄉先生歿而祭于社寧遠

雖蕞爾邑而先生之流風未墜不可以無祠也子也學
先生之道而尊其名麗牲有石將以識里人奉嘗之思
子為記之某嘗聞人道之要有三曰父曰君曰師無父
無生無君無以生無師猶無生也唐虞三代盛時民生
於風氣之未漓又得堯舜禹湯文武成王周公為之君
師今其法度紀綱猶可以概見大抵合以井牧聯以比
閭教以庠序導以師長維以諫救考以德藝無一壞一
民不相連屬焉正歲孟月之吉黨里社崇之會無一事

一時不相警策焉夫然故教行俗成而君師之分盡迨厲宣幽平已不能成周之舊仁鄙壽夭民自為之為君師者不及知也矧自是以降乎曾子曰上失其道民散久矣當斯時也而民之散已二三十年則雖以孔孟之道而無其位亦不能聯屬而維持之然猶不忍吾之同體俵俵然如窮人之無所歸也乃屬其徒類而教之近以淑其國人弟子遠以垂諸天下後世民之久散者固已不能遽返而為士者猶有所屬則斯文不琢以俟來

聖猶將有望焉而天未欲平治也雖以孔門弟子一再傳而失之況秦漢而後學殘文闕師異指殊泮渙滋甚董仲舒嘗請諸不居六藝之科孔子之術者皆絕其道庶幾統紀可一民知所從而時君不足以行其說迨其後也才知之士各挾其所溺以行於世不務記覽則淪虛無不為權利則銜詞采至是而不轉民散士亦散矣不有先生發太極本然之體明二五所乘之幾而示人以日用常行至近至切之理則異端小道將誣民惑世

於無所終極又非二程子張子推而大之扶持綿延以
開中興諸儒則先生之絕學又將孑然孤立猗其盛哉
然而至近世朱文公張宣公呂成公諸儒死士各挾其
所以溺於人者溺人而士之散滋甚記問學之末也今
又非聖賢之書而虞初稗官矣虛無道之害也今又非
佛老之初而梵唄土木矣權利誼之蠹也今又非管晏
之遺而錐刀豪末矣詞章伎之小也今又非騷選之文
而淫哇淺俚矣此宜憂世之士所以悼道之湮鬱而慨

然有感于儒先之教象而祠之尸而祝之也然而民既散矣有士以屬之士既散矣終不可復屬邪有書以屬之天命流行亘千古如一日先生見孔孟之心於千五百年之久先生之書爛如日星家藏而人誦之豈無見先生之心而興起者邪先生初見二程子使之求孔顏之所樂也日筆之於書曰志伊尹之所志學顏子之所學嗚呼得孔顏之所以樂則必不以務記覽工詞章慕虛寂為能也得伊尹之所以志則雖刀豪末之得失不

足以為戚忻也吾黨之士盍相與懋明此理尚庶幾士有所屬而民不失望焉

泉州紫帽山金粟觀記

泉州道士黃去華遇臨邛魏了翁而言曰同安郡紫帽山在郡治十里其陰有洞壑直清源西勢之左右金粟洞天其名見于道書所以列五千名山中為峰凡十有二稍東為凌霄塔右有石鼓丹爐仙趾試劒棋局仙掌諸峰及補陀巖又其右為洞可容數人舊傳為真人受

洛中羽士書而以粟遺致書人歸視皆精金即其處也
按唐仙傳長樂鄭文叔與回翁皆師鍾離於此郡立鄭
君祠號玄德真人山舊有無塵殿久而常新去華以素
中裝為錢三百萬而一寓公巨室出力佐之為觀宇於
絕巘堂殿館祠榮翼庖湑彪分昉列中建三教堂藏諸
道釋及儒家諸書複寢重闈賓客有館學徒有舍其止
有汭愁歸雲二亭其麓有清水五塔山之半有飛泉作
漱玉亭以面之嘉定四年茂陵賜金粟之洞四字椒殿

賜緡錢百萬儲宮為扁凝雲堂一時名公鉅卿又請賜之號榮給以田產蓋經始於五年之春落成於十四年之秋去華之用力於斯亦既勤且久矣而獨未有以記之敢贏糧以請于公余閱其事而有未喻者且三教之設精粗本末言人人殊今乃混一之者將比而同之邪曰至而滋息生之始也日返而遊散生之終也此聚散之常理也今曰有所謂仙人者常往來于茲跡之而不可見然則氣有聚而不散者乎陽降陰升自無而為有

也來伸往屈由有而入無也此新陳之常理也今必曰有所謂無塵殿者歷年雖久潔淨不污然則物有新而無陳乎天生蒸民有物有則故有目耳鼻口之物則有視聽食息之則此可信不誣也今日餽人以粟餓而為金然則耳目之所接且不可信況所不接者乎夫不得於言何有不求于心今余于是說未之有得而不復反求乎心之所安為爾強書之決知其不可也道士曰顏魯公世之真丈夫也麻姑擲米成丹之事非獨餽粟成

金者乎魯公書之不疑子安知六合之外無是說也曰
爾為魯公有取于此乎王方平目之為狡獪變化而公
書之其果有取乎吾聖人語常不過怪語德不語力語
治不語亂語人不語神懼末流之害也爾師之初綿綿
若存所謂專氣致柔此不過恬養虛應以自淑其身者
之所為未甚害也然而動靜之理未嘗相離寂感之幾
間不容髮今厭紛畏害而欲深自嗇縮以全吾生則自
其始初固已改道器為二致其末流之弊學焉而不至

者必將垢濁斯世妄意六合之外以求其所謂道而神仙荒誕之說於是投虛乘間靡所不有而去道益遠矣道士曰然子亦有以告我乎曰吾之所為道與師之所謂道終不可以盡合也而循其本初固未甚遠爾歸告爾徒求之爾心而知所謂若存者何物致柔者何事而有以瞬存息察焉則不惟可以不叛爾教而存體而明用吾猶有望于歸儒焉道士曰唯唯遂書為記

潼川轉運司重建東衙記

遂寧為東川要藩轉運使治焉異時使副判官參實並
列不常厥居乃數十年始從省併有判官則闕使副故
來者惟吾東解歲修月蠲吾用永存嘉定十有二年夏
興元卒張福莫簡叛灰利檄閭抄果踐遂於是東解之
僅存者一二乃皆燕游不急之所使者移寓西解解以
久虛弗葺番陽汪侯來領使事過故解徬徨躊躇顧謂
寮吏是觀聽攸屬久而弗復不自羞乎程事期度有司
凡緡錢六萬米千石丁匠四萬六千九百侯曰損無益

之費假以歲月不潰于成乎府人效實梓匠授規列辟
聞風畢獻厥力昉十四年秋八月訖十六年之四月
室寢堂與榮序門廡筦庫庖福以次備具至於賓掾
有館文書有庋府史有舍視舊規寔殆將過之役成
屬余識其顛末余憮然有感焉國朝自削方鎮以諸
道賦租筦榷屬之轉運以房廊地利坊場河渡二稅則
額付之郡守操重制輕易危就安此權時之妙筭也然
權任雖分財力猶裕自熙寧分使榷利郡守之權始削

脫有城郭甲兵之費必以控于轉運往往滯吝不予則
違時而曠事政宣之末交受其害至中興以後乃又以
外司農護餉而所謂轉運者僅為催科團併之司設官
初意愈傳愈失故封疆之吏無所於告則城壞弗葺兵
闕弗治祇以示弱誨姦嗚呼流弊至此寧得無以變通
之乎然而此蓋在上者之所當知而非居是官者之責
是官之責將簿書期會之問乎非直然也學校以明倫
理科舉以興德行舉刺以別淑慝聽斷以達幽枉凡皆

典禮命討之所闢為君師者建牧立監而分治之所以
共天命而繫邦國也今之分道置使則猶立監之僅存
者況我祖宗惠綏遠服四蜀漕寄在今尤重四時銓擬
得以通掌四選遇有空官則聽其舉辟假以移注許之
就權然則非所謂厚望隆指邪若之何其稱之非平心
不能以燭理也非虛已不能以盡下也非剛毅有守無
以塞僥倖也非清淳履道無以厲廉隅也非孜孜夙夜
惻瘼乃身則又不足以濟登茲也詩曰職思其居謂盡

瘁於所當事也又曰職思其外則慮廣而志宏矣其亂
曰職思其憂蓋無時而可也者余昔居是官也嘗以自
厲而未之能信汪侯乾道樞使莊敏公之家宦學遠有
端緒茲事也固已習聞而篤踐之矣尚敢誦聞以復于
侯將書諸石與同志者共焉

鶴山集卷四十三

欽定四庫全書

鶴山集卷四十四

宋 魏了翁 撰

記

叙州諸葛武侯忠靈廟碑

六年
七月

古者自天子至于大夫士皆有廟廟之子姓以昭穆為序祭非正主則不厭不嘏不旅不酢非同姓同宗同族則不得與於祭大烝瞽宗雖有他姓之祀而不立同氣之尸與廟祀異自鯀祀于晉相祀于衛周公而祀于鄭

董安于而祀于趙大非先王之舊魯展禽至謂先王制
祀有法施於民以勞定國禦災捍患之目然五六經之
書終於無文漢高起沛黃帝有祠迨其中葉故侯有祠
又其後也先墓有祠至永平以來則墓祀尤盛極于諸
葛公之卒人思之不置巷祭野祀朝論以禮秩止之然
則士大夫至是尚知禮秩之不可踰也習隆尚充因人
情之不可遏請即墓之近立廟沔陽而斷其私祀親屬
故吏乃得與祭雖然是猶近墓為廟非節不祠非親故

不與也其後所至郡國為他人之親立廟不知始于何
年也非鬼祭之越望之祠無所無之姑即夫禮之變而
言則有功有德於其國而祠之尚人心之不可已也叙
故有諸葛武興王廟至興國皇祐一再更修猶存孟蜀
武興之名元豐三年賜瀘州廟額曰忠靈而叙未之有
改紹定五年遂寧馮侯邦佐為守上距皇祐歷玄默執
徐之歲凡三廟既久弗侯徹而大之以屬記于予會被
命守瀘道出叙侯要予于新廟落是役之成媵爵而言

曰祠記之請願毋我忘予謝未皇也既抵攸司馮侯又以書來曰公之行乎蜀江非一役矣建興二年渡瀘之後由越雋而入則瀘之原也四郡悉平歸至漢陽遇降人李鴻漢陽今之長寧則瀘之委也或者猶謂非今江陽不知瀘有三重大渡水也孫水也瀘水也其源雖分其歸則一予即其言又為探原索委而重有感焉且渡瀘公細事耳山川流峙千古一日而傳注淆訛靡有定屆沉公用蜀之心人得而盡知乎裴松之引漢地理書

謂瀘水出牂柯郡句町縣古今異名既無以證樂史直
謂廬峰地瘴惟五月可渡廬峰即今堡山是殆以郡名
瀘指廬峰為瀘水不知是峰乃在不韋縣之北於堡山
奚與公雖嘗至江陽而非所謂渡瀘也哉或謂在徼外
沙野城之境或謂姚州河鎖驛之濱尤為無據獨華陽
國志與雲南錄差若可信而二書亦相抵牾嗚呼周公
瑾之赤壁非黃也庾元規之南樓非鄂也況公瑾元規
匪公敢匹而猶牽引傳會何非其實此地實公所行也

人之疑信乃反不一竊嘗考之史志參以水經又證之以建興南討之由大抵是水也始于西南徼外吐蕃之地曲羅東下三百又東注為三重瀘又東為西瀘水縣又東北會孫水舊水又北會大渡水其支分為朱提水若水芋官水繩水淹水咸會于越舊郡之馬湖縣由東北至焚道縣入江其地則西距黎雅東接五谿北抵瀘叙其通稱之皆曰瀘昭烈伐吳之役蓋慮五谿諸蠻附吳以撓我也亟使馬良招之至于秭歸之敗諸蠻果叛

益州牂柯永昌建寧四郡怙險嗇禍渠帥雖闔至於殺
正昂縛刺史張裔以畀吳人嗾孟獲以扇諸蠻越雋牂
柯胥為畔援當斯時也使雖闔不誅則四郡不平四郡
不平則內難未弭而巴蜀不得安中原未可圖也是以
南征之師勢不可已然尚以昭烈之歿須暇之三年然
後遣李恢出建寧馬忠出牂柯而身自出越雋跡公道
所從出大抵涉大渡亂孫水破越雋斬雖闔絕馬湖禽
孟獲蕩平四郡遍歷三瀘遂南極涪池深入不毛之地

勒銘誓虜道滇水漢陽以歸以予所知合馮侯所考公
之渡瀘昭昭乎聲跡之可尋而叙之廟公也洋洋乎精
神之如在藐茲某敢以寡陋不辭為謝乃為叙其事而
系之銘曰人以一心奠位堪輿或為大人或小人儒其
大伊何我居廣居我立正位我行大途無詭而獲有範
而迂所謂小人功不蓋媿伐罪似仁尊王似義會盟似
信險詐似知迹其本心假名成事行之以正猶曰小器
又其小者私欲求濟皇皇奕奕祇嚇庸穉拔本而言穿窬

之類自秦滅學罔擇善利惟兩董公獨識此意是開叔
未蹈誼秉節迨諸葛公皦如天日開誠廣益引咎布失
是心之度臯伊旦爽漢主未顧隱然人龍厥既顧之前
無二雄扶漢植華嫋姦剪戎以奠人極以宅帝衷其在
梁益風績彌密今其僅存八陣遺蹤在昔風后佐帝有
熊爰作握奇八陣所宗八八相乘陣間容陣翕闢乾坤
翼長首奮考之先天方圓二圖後天卦氣以莫不符謂
比管樂謂書申韓跡公所為史牒可刊或者謂公嘔血

酸辛又云卧龍盡終其身義理不競成敗論人人生海
內曾不百年是心昭昭不與迹陳我盡吾分君君臣臣
功成不成奈何乎天

元符忠諫堂記

予昔為丹稜楊慶崇作誌其子邁以事狀來閱其世有
大父諱恂舉元豐五年進士終承議郎予以書反曰崇
寧籍元祐姦黨定元符上書人邪等與而大父同姓名
者非此其是與而先是未有識之邁曰郡志有之子其

為我發之亡何邁求予書元符閣又亡何李柱史季尤
又為承議之五世孫仲炎書元符忠諫之家予歸自靖
仲炎請曰先人之敝廬則忠諫之故址也詩云維桑與
梓必恭敬止我將以忠諫名吾閣予為記之予慨然有
感於世道之變人情之反乃至若此且曰姦曰邪名之
至惡王法之所必誅也人之於先祖也為銘物為祭彝
鼎為壝誌稱美而不稱惡今崇寧用事之臣籍其祖於
邪類附其事於姦黨而子孫矜以為榮名實不已戾乎

竊嘗稽諸五三六經之傳自君君臣臣父子子兄兄弟弟夫夫婦婦以至仁義禮智之性陰陽柔剛之分卑高貴賤之等是非邪正之別名之必可言言之必可行未嘗有無實之名也故聖賢之言名不與實對迨周之良始有名與實戾者名之君而實不君名之臣而實不臣以至不父不子不兄不弟不夫不婦無時無之夫既名浮於實則於是有名實之說逮其又甚則放辭者盜丘非軻矣嫉世者溷夷廉跖矣至楚人則白可黑矣上

可下矣至秦人則鹿可馬矣黑可黃矣至漢則鵲雀可
鳳矣至隋則野鳥可鸞矣然而以格人元夫為姦邪播
之詔令勒之金石書之史冊不忌不疑如京卞之為則
未之見雖東漢嘗以黨人錮士大夫李唐牛李相傾相
軋不極於亂不已固未嘗被以溢惡無實之名也自京
卞一開其端變亂白黑實為陰乘陽賤陵貴小加大之
兆至於秦檜習非效尤遂取張胡李趙之所引用者加
之叛逆之名株連逮繫五十三家將以為戮韓侂冑柄

國則又以附于趙忠定公者名之逆黨學於朱文公者名之偽黨夫曰姦曰邪曰逆曰偽本以怖而攜之也而願附名籍者唯恐後則是古者至不美之名在近世反為至美之事況夫人以渺然之身血氣所拘不百年耳濫貴素飽曾幾何時而為是背理反道之事不思萬世在後是非予奪著乎人心瞭不可掩溫文正公申正獻公與凡元祐元符著藉之士以及乎紹興慶元黨人蓋皎然如天日之清明庸夫孺子裔夷醜類孰不知之今

蒙以甚惡之名在諸賢無毫髮加損也祇以貽千載之一喙耳彼京卞檜侂必不以姦邪自名也而世之言姦邪者自丁夏章呂而次未嘗舍四人而他求而苛於方人者猶曰是姦邪之靡者雖孝子慈孫於其父祖亦且諱聞而羞道之至此則名實始雖少紊而終固未嘗紊也陳仲舉聞范滂博之去嘆曰今既成其去就之名得無自取不優之議然則為柄臣者誣人以姦邪本起穢以為臭然而不能臭人祇自臭耳姑以利害言之來者

亦當知所擇云

資州省元樓記

宕渠馮侯守資之明年重建州西樓成以書抵某曰資故有樓以省元名為淳熙宰相文定趙公作也自嘉泰之季故侯陳勤節公嘗撤而新之歲久積剥方議改為阨於吳回之變乃捐少府錢六十萬拓而新之如飛如翔突兀闐闐公為我書其顏且記成事予嘗讀太史公書謂隴蜀山川甲於天下以予所見資之山水又甲於

蜀其岡巒崑峙若顧若留雒水盤紆有滙有滄是宜篤
生多士繇漢以來有稱焉陳侯之作是樓也故廣安守
趙公昱為之記今馮侯述之又將有望於將來予敢以
固陋辭嘗觀祖宗全盛時群天下之士試之南宮蜀人
率居前列如眉之師與楊邛之宋與李盡自政和執徐
之歲至宣和之執徐僅一星終而同邑同郡接踵掄魁者
四亦云盛矣自六飛駐揚進士道梗命諸道提刑司選
吏部轉運司各為類試紹興元年始擇監司帥守總其

事張忠獻公時以元樞奉使川陝治秦州即秦為類省
試諸道之合蓋此乎昉為舉首者恩視廷試三人至紹
興五年十二月戊子詔書又申言之自十有七年何道
夫對策謂蜀人難進易退高視天下而竊笑為嫚秦所
愠繇是蜀之首選而不對大門者率列之下科隆興初
元詔免策士趙文定公始以紹興五年詔書賜第由虞
忠肅公之薦乃得召對文定而後首選又二十有三人
皆未有不薦而召者議者謹曰以科目取之而不以科

目用之安在其為舉首也不則曰蜀去行都遠而見遺
乃其所也是皆然矣以愚觀於窮達之既定者則有非
人力所能升沈也人之器識罔不在初請無以他以資
之士言之文定幼負奇氣軼羣邁醜發為詞章閎深博
大故自中興以來冠類試者三十餘人公所試言人即
知其為宰輔之器此何可以強致其後張義立之剛毅
不撓何從叔之端厚無華人亦于始進焉知之且陰陽
五行特二氣之大分而經緯錯綜氣聚而形化則人物

生之於是乎有剛有柔即剛柔之偏於是乎有善有惡
剛之善也其言直以暢惡也其言粗以厲柔之善也其
言和以舒惡也其言闇以弱是則言也者命于氣稟之
剛柔剛柔既分厚薄斷矣雖他日事業之廣狹時位之
窮通亦未有不繇之此誠非人力可以升沈者唐人謂
士之致遠先器識後文藝如王陽盧駱雖有才而浮躁
銜露豈享爵祿者夫其浮躁銜露則氣稟之薄然也氣
稟之薄而望其器識之厚爵祿之富得乎然則為士者

果無所用其力矣曰不然也志有所守而大本先立則氣得其養而生生不窮夫如是可以變化氣質愚明柔強其幼而學也必不肯襲浮踵陋以至乎苟得其壯而行也必不肯計功求獲以安於小成況又能行之以剛健守之以篤實則輝光日新雖引而聖賢可也奚區區科目名位之足云竊意馮侯之乞言將以告于邦之士也故為發其義者如此

綿竹縣湖橋記

前知綿竹縣宇文西叔峒今列屬版曹自財賦所抵予
書曰走也不敏為吏于紫巖之下每惟是邦世載人物
予不暇悉數也而其尤著者如吾宗止止先生為鄉碩
儒范忠文公程大夫父子亟稱之魏忠獻張公以精忠
大義為中興名相其子宣公則我之所自出也又以問
學為世儒宗流風蔚如實啟來哲而無以致高山仰止
之思也迺因人士有請度地飛鳧門外瀦為湖周廣六
十有五丈伐石為四砮砮崇四尺架梁其上而屋之衡

從合十丈以通南北車徒之往來始紹定四年春二月
戊午訖夏四月壬午竹木土石之工凡三千九百六十
有五合為錢五百一十九萬有奇皆節縮浮蠹以營之
人見輿梁之麗貫接紫巖如虹卧波而不知役之我加
與材之所自出也願為紀其經始之勤而明其尊德之
志予嘗謂孔子閒居之篇不知孰為之而其言天地之
神為風雨霜露為風霆流形凡示人於覆載間者無非
至教此義之至精者也繼之曰清明在躬氣志如神又

舉詩以明之曰維嶽降神生甫及申終之曰此文武之德也蓋自天地山川之神氣鍾而為人是心清明與宇宙之內流行發見者實同一原又推本而求之有如甫申之生乃繇十世而上文武二王積德所感嗚呼人之此心與天地山川相為流通固也而人物之生又係乎時數清明之感山川英靈之會祖宗德澤之積然則是豈數數然哉若紫巖之諸賢者真有以闢盛衰之運當消長之數矣因西叔之請併發其義嗚呼吾猶有望也

夫

晉州貢院記

禮部之有貢院自唐開元始國朝科舉雖襲唐舊而貢院之或廢或置或毀或復至崇寧而後有定所政和二年從董正封之請諸郡得立貢院然舍法既罷則貢院亦隨廢矣蜀自中興以來生聚教訓既百有餘年儒風丕振應貢之士歲滋月益而諸郡校士非學宮則佛舍也其特為之宮者遠則六十年近止三五歲耳晉於東

川號多士而亦寓於學官嘉泰中郡人嘗議卜築其說曰即學試士毋害也而前窗後枕士爭門入者來之皆坎也況孔堂肅穆而羣趨錯立喧瀆已甚盍議改為建嘉定以來劉文節公大理少卿楊昌伯天官侍郎許成子與了翁皆欲縱吏其成而曠日綿襪或死或去臨邛楊侯楚望宰郡暮年郡以大治土地于國之陽曰和慶寺砥平席衍而勢爽明龍泉屹左鳳山峙右士從龜襲乃下令徙寺且庚鄰田以益之賦又東西五十南北六

十既輟少府用度之贏又告諸本道轉運刑獄使者及卿大夫士以補其乏士受役要不以厲民面陽作堂左个之楹五堂後架樓其中又為堂列八內于東西二夾為主司直舍試士之廡東西鄉各三列中為堂皇深廣皆五尋重門鼎列封彌謐錄之司庖福吏士之舍靡徹不備遷舊廡之麗于學而材可用者得十之一既就緒以書來諗曰伯雨為普人肇修曠典執事師帥本道敢徼一言以寵靈之某為人記貢院記學官多矣然而考

諸制度之詳略風俗之厚薄則未嘗不致疑焉且國初天下未有學也慶厯三年以後雖用范文正公之議詔州縣立學然學未遍而詔旋寢矣迨崇寧以蔡京之請州縣無遠小咸得立學學官之備乃昉乎此國初貢院廢置亦無常居自崇寧至政和中都外郡咸有貢院貢院之備又昉此夫既養士于學又為貢士之官以重其事風厲作成是宜人才輩出以稱隆指然以今視之崇寧養才孰與國初崇寧以後得士孰與國初天下之理至于

制逾密而敝滋多法既詳而姦不勝則亦必有故矣夫
所謂科舉取士者非有比閭族黨月書歲考之素直以
寸晷之文一夫之目拔自疏賤畀之長治五侯三吏皆
由此選此非細事也然而梅子其所謂四海士民之數
能言之類至多也指世陳教言成文章質諸先聖而不
謬施之當世合時務者亦無幾人夫使以言取之而不
謬于先聖不慙於當世則雖以言取人未為甚失也乃
自俗流世敗有司之操衡尺士子之揣程度者大抵舍

其德性之知易其師友之素而相與求合於卑諂之中當歲大比往往竊取朝廷餘論薦紳奏疏與郡國郎吏所傳昉分條別纂綴以備問使朝廷清明君仁臣直則上無闕政下無詆訕詞正學以言猶可得士脫不幸而遭時之難問紹述則贊紹述謀和親則贊和親欲開邊則是開邊大抵鑿經術以傳世好刺邪說以阿有司或者貪黷成風則貨取勢奪抑又有甚難言者然則雖為庠序以肄其業宮室以校其藝其不能以得天下士蓋可億

而知之矣中興至今有百餘載治化休盛士習純美所謂傳世好阿有司貨取而勢奪者固無崇政之甚然比歲以來不保其不盡然脫使始進若是則措諸事業抑從可知因楚望之屬記于余也慨然有感於世變之推移故直書其事以告之者若此或幸而刻諸石則校士於斯試言于斯者其亦知所發哉楚望二世登進士科所居有善政云

楊文安公祠堂記

古者天子之縣內諸侯祿也故於采地得立廟祧外諸侯嗣也則于所都之邑焉凡皆有酢有厭有嘏有妥有旅蓋同氣之祠非舍奠祭菜饗器用幣之比也春秋以降事已變古如莊周書畏壘事雖一時寓言竊意吏祠于社已萌芽于此時秦漢而後封建壞郡縣吏計歲月代更有德于民如燕齊之藥公民徃徃立之社然猶配食于社未有特祠也蜀守文翁齊相石慶史民為之立祠繇是桐鄉南陽渭城之祠史不絕書事之變古亦云

甚矣若于定國為縣獄吏則又生而得祠人之生也氣聚魄凝奚從祠之其原既開乃有張武威任九真杜池陽陸浚儀之等皆如于祠逮隋唐以降故侯之祠紛紛史冊不可殫述而人不以為異雖然事誠戾古也而繩以甘棠勿剪之義猶曰變之正者隆興初眉山楊文安公以成德夙望由參知政事出領東川節度府先是建炎三年公為節度推官逮紹興十五年由潼川路轉運判官移提點刑獄至是凡三仕于此矣流風善政蔚其

如存後七十年公之孫瑾復來領州下車拜文安繪象
歎歔感懷州宅有載德堂刑獄使者解有德遠堂學宮
有祥鱣堂節度推官解有遠業堂昏邦人思公而致其
誠者為之子孫不敢忘其祖則不敢厲其祖之民為政
朞年民便安之耆耄請改建文安之宇以昭弗忘侯徇
民請度地考室與趙文定懷德堂對峙而貽書某曰是
不惟吾祖所居官瑾也實此乎生今四百二十甲子矣
天子不以其不肖嗣守茲土視事朞歲幸不得罪民士

以貽吾祖羞是祠之建匪吾敢私維邦人是從公也嘗
以使傳州符尋臨是邦敢以邦人之請請某輟然喜曰
彼秦漢以來以他姓而祠故侯實戾古典然猶得為變
之正今以孫而祠其祖尚古者外諸侯立廟都邑之近
似是敢以淺陋辭維文安公起太學試禮部冠萬七千
士退然無矜色而有戚容曰此吾先人所不能得者而
以遺小子予蓋自是翺翔外服十有四年始以趙忠簡
公之薦有位于朝洎檜枋國公亟詭外檜死而後躋禁

從位丞弼最後均佚潼川遂以祠宮之祿老于家其年
行閎閱有考功博士之議有太史氏之錄有狀其行有
銘其隧有序其文大抵詞令足以華國名行足以砥俗
德量足以鎮浮夫非私于一州者特其始中終皆在潼為
莫府而識者知為公輔之器司臬事而察辭蔽訟人自
以不寃後以前執政為帥民習其教不肅而成宜公之
去而民思之深今楊侯年未五十歷官六郡守風績既
茂擢延閣之直趾美復來邦人懷今悼昔奉嘗之敬不

懈益厪是區區者誰實使之嗚呼楊侯視此其益知所
勉哉宣王命名穆公之旬江漢也曰于周受命自召祖
命蓋以乃祖康公命之皇父之征徐方也曰南仲大祖大
師皇父亦以大祖南仲命之古之人命其臣也必命以
乃祖之事豈惟繼世象賢所以刑善降德示之儀法者
多矣今楊侯實生是邦而朝廷又命侯以文安之事顧
瞻山川想象憩爰退而衣德服訓以臨其民必惕然以
想曰斯民也吾祖文安公之所與共理也朝夕思念于

前于衡于羹于牆如照臨其上如陟降于庭蓋有不見而著不言而形斯其為善政之助不已多乎詩曰維桑與梓必恭敬止嗚呼侯尚勉之哉

毛氏慈惠莊記

氣載理而流形於天地間有餘不足相為質也寒茲微息一不遂其生見者為動矧靈而為人雖貴賤有分定戚疏有差等實同體也古者比閭而居夫井而耕出入必相友守望必相助羨不足必相補凶荒必有待委積

必有給莫非使民相生相養以輔成天地生生之德所謂由溺耻饑內溝撻市油然發衷非有為而為之也後世以身發財者膠固滯吝人緩急扣門拒之恐不峻孟子曰無惻隱之心非人也人與萬物並生則與萬物同體乃今朝圖夕維不越於一家一身之私吁天之予人也顧使之自有餘於一家一身矣乎人而不達乎親親仁民愛物之分義則陷于不仁而非人矣予歸自靖之歲洪雅毛君拱已介予友史叔欽予謙得見自言其家

世崇德好義道行於妻子蓋無不能充是心焉嬪董士族也嘗損金市田歲儲其入而昏嫁而喪葬而疾病而貧不自贍者於我乎給董歿拱已又裒餘金以廣之今為田百畝別其王祖之藉築之墻圖書其疆畎而字之曰慈惠莊懼後之不我引也願得一言以為子孫之遺予語之曰吝嗇者陰氣之常亦有粗見理道頗樂施予不過泥滯於佛老卜祝之間至於力行諸身子當其義不為異端怵可以為難子能充是心而行之子孫安有

不能以是心守之范文正公吳郡義田到于今莫敢廢
子無媿于范公之心雖百世可知矣子何病諸不然匪
義之循惟惠之行如異端有施有報之說責効於旦夕
是有為為之本之則無其能久乎毛君作而曰拱己雖
不敏願書以為記

夔州卧龍山記

予久聞夔州卧龍山之勝開禧單閣之歲歸自王朝至
蜀門則避地之荆者蔽瞿唐而下將登山而止紹定單

關之歲還自南遷至蜀門則避地趨峽者蔽渝江而下
又將登山而不果先是丁文伯為帥守嘗以記屬予逮
同朝又言之中以不一還山恨恨弗慊也又二年而予
守瀘山之主僧曰惠行叙山中之槩以督前諾其畧曰
山為一山之望山趾距城僅隔瀼東一水其上為咸平
寺寺雖名咸平而有天成長興開寶題識非始于咸平
也寺之上有五龍水又為野豬池地上為山又數里乃
至絕頂耆舊相傳謂諸葛忠武侯駐軍此山池曰飲馬

田曰東屯田所殖稻一方無與並美寺居高峰極清寒
盛夏可袂衣山之泉之松人謂杜子美真諦寺詩變之
諸刹惟此可當是必為真諦理或然也四朝御書閣與
善法堂居中昭烈帝忠武侯祠居左右後為便坐上有
周閣又上為丈室傍翼憲軒凡二百餘楹由大士祠宇
前路通觀音泉越野橋有一大亭巨石與喬木雜錯泉
瀾瀾其下遙見峽壁嶙峋江聲澎湃野橋之路又通東
屯客至必徘徊移晷自慶元二年了悟主山嘉定三年

丁侯以惠行繼之歲修月葺以潰于成金碧翬飛徒衆雲集雖皆我所當為無足以污紀載獨念山未有記亡以詔久遠盍為昭烈君臣少叙梗概予自守瀘以來方為侯推明渡瀘本末勒諸叙南廟碑今以行之請也不敢辭然而稽諸圖乘碑銘而有可疑者武侯之始卒也人思之不置卷祭野祀不可得而禦習隆尚充請因人情為之立祠而朝論必謂禮秩之所不許蓋自東漢而上猶有以仕國墳墓繪象立祠為不盡然者於是禦之

不得僅使即沔陽之墓為廟非親故不得祠今山之有祠也蓋關乎世道之變而莫知始于何時子美之詩曰玉殿虛無野寺中又曰一體君臣祭祀同則昭烈固與武侯並祠也而張舍人震謂始命寺僧惠璉為侯創祠未知何時存帝廟而廢侯祠也近世張大寧鎬文謂先主之廟徙諸江濱今復其舊又未知何時存侯祠而徙帝廟也往牒所無不可得而强考大抵武侯自荆之蜀與昭烈會其後受遺于永安宮往返道夔皆駐軍是山

故自晉永平以來託侯以名山山以侯名後人乃為侯立祠夫既祠侯則昭烈之卒實在永安亦何可不祠一時君臣既社而祠之矣復慮夫委之空山無在為守也則為寺以館僧將為永久之圖此皆後世人情之推典禮之變苟以致其誠信者無不盡也而予謂久近之實則固不在此方其以崎嶇之蜀抗鬼蜮之魏強弱不敵也蜀師未出而將星夜殞使操懿君臣盱衡得氣勝負又不侔也陳壽以私怨作史如比管樂書申韓以訖于

祁山之役憂患嘔血誣謗亦非不多也然而有不可得而泯者夫天命不已物生無窮彼近功小利與人之氣形卒緣乎盡而是心之止于所不見感于所不係者昭昭靈靈著在方冊昭烈君臣尊君父討亂賊之心與山川俱存以到于今蓋不惟成都之繪象渡瀘之遺跡夔子之故祠邦人扶植愛護莫敢剪拜雖八陣之見于新都沔陽與今魚復之蹟四頭八尾隅落鈎連隊陳相容觸處為首所以寓先天心法之祕者雖陵夷谷遷是陳

也亘千載而獨存殆若有神司之彼操懿君臣欺孤盜鼎雖萬世在後與一時利害不相涉也而三尺童子且唾棄不之顧陳壽誣譏公理人之視之如見肺肝亦祇以自黜然則士之以千載自許者其必有發于斯言矣惠行潼川人文伯名黼嘗為將作監今經略廣南西路立朝鯁挺故其所崇尚者若此

重建四川總領所記

太府少卿四川總領財賦安北望自益昌以書抵某曰

吾所居廨自開禧至紹定之遇單閼之歲皆厄寇鈔癸
仲不佞承之于訐潰之餘披荆榛以舍官吏大懼無以
存吏體一民聽乃即舊趾更治寺之門西鄉而為堂樓
以鎮之左控寶峰右拊烏龍西指劔關北走三泉復相
地形為堂于樓之東凡皆節縮浮費以潰于成昔天子
之命我也曰將指給餉上下通情當勿乏興濟我戎事
癸仲敬共夙夜無敢失墜今名堂曰通濟以識弗忘樓
名北定則取鄭亨仲剛中思耕亭語子為我記之某作

而嘆曰於赫王明照知萬里使兵自兵食自食上下不相恤也有無不相通也胡可以一朝居北望所以荅揚明命之意美矣盡矣而予敢以淺陋辭雖然餉所主財粟宣制司主軍民二司之不相為謀也久矣蓋自建炎三年張忠獻公宣威川陝始承制以主管茶馬趙應祥開為隨軍轉運使總領四川財賦雖云總賦未以名官也張公虛已以任趙公盡力以報自忠獻之去則交相為瘡矣吳玠與開爭陸運而吳趙始不咸詔遣都漕親

督錢糧以應吳俾制置大使席益起行大光乃以轉運
司錢就糴于果利閬而席趙又不咸李子及繼之吳
武安劾其乏興而吳李又不咸趙不弃繼之與鄭亨仲
分隸宣總司錢而鄭趙又不咸然是時和親既久未有
緩急牽制之患也紹興之末王瞻叔之望以括民白契
與制置使沈德和介交章爭辨而王沈之不咸至是滋
甚大抵三十四年之間二司紛紛殆如先正所謂三司
取財已盡而樞密益兵無窮者實矛盾之術使然耳聞

禧以後事異前時吳曦生長邊陲習聞交爭之害而未睹相資之利密啟于韓侂冑俾宣司得以制財賦之入出其事似是而其實不然蓋曦既畜無君之心將託是為亂而正使由其術而不悟耳趙季明善宣劉志大崇之以是各相繼引去曦既授首財之僅存者六百萬是歲之出乃至四千餘萬陳勤節公咸未知所以為計微安沂公為之移屯減戍運粟括財有以翼蔽而扶掖之勤節公迂懦亦未知攸濟矣王君釜代陳雖拔節制之

命出於權臣釐而正之是也不知二司之情不可以不通未幾而張東甫子震繼之歲虧四百萬莫非倚安公以共濟王鈐代張又昧乎此擠安公而去之始未見甚害也一旦寇乘虛大入董仁父居誼蒼黃度劒王董之勢相扼不容以不易使也則楊九鼎代之以激叛卒之變於是代楊者任君處厚一惟沂公與南海崔正子是依僅克有濟崔去而鄭代之自五州三關以內日賸月削極于近歲而益不可為矣歲入不及二十萬緡而歲

出倍之四大軍歲為糧百五十萬不關外居居而漕運
裁一今二年之間失糴三百萬石關之内外七十餘倉
又為灰燼則官軍民卒九百餘人所仰哺者惟一分漕
粟耳幾何而不乏于供乎某之生也後猶及周旋于泰
禧以來諸公間竊以為今之所謂四總領者名雖同而
實則異事雖久而實則異蓋江上三總領自朝廷歲計
其費為之科撥而四川之歲入不能半其出則朝廷不
問也總領之始所以察諸戍之欺且吝也今不惟不能

以行其職而一司當入之緡當行之事反見侵于他司
然則將為之弛弓而更瑟焉其訓詞之所謂上下通情
者乎上而朝廷以時科降歲有常數不必待其請也近
而制其梱減戍併屯虛實相知有無相通不必責其償
也夫如是又以制梱之令行于戎司覈窾籍明功賞息
餽賂行于監司牧之信期會節浮蠹登于財行於並邊
諸郡固疆場以墾荒嚴戍守以衛農毋從便文惟實德
是踐毋事苟充惟經久是圖則日積月累政行令孚蜀

其有瘳乎易曰樽酒簋二剛柔際也此上下同心有無相通以共濟艱險之時敢發斯義用荅揚明天子之丕顯休命北望沂公之冢嗣也才器開偉甚似其先人云

合州建濂溪先生祠堂記

濂溪先生周子嘗仕於合陽予奉使東川日請為周程三子易名先帝下其奏奉常謚周子曰元二程子曰純曰正以制書頒二氏子孫予既奉行惟恪且飭郡將買田以備丞嘗連帥永嘉曹叔遠嗣贊成事屬予記之未果

也厥十有五年返自南遷起家守瀘合士稅中之持張
宗範養心亭題說諗予曰朱文公著通書附錄首載此
篇今春官貳卿度正每以為恨曰宗範吾州人也而郡
乘放失於是蒐求之累歲始得石刻于地中凡一百七
十年而遺蹟儼存殆非偶然也周子故有繪象於學西
偏地下瀕江屢圯于水鄉進士羅艮十餘人嘗以請于
予予為移書太府少卿安癸仲得官屋于州岡前挹巴
嶽銅梁諸峰而涪漢二水匯其下若天作地藏以待今

日者扁曰瑞應山房以祠先生配以二程子郡少府又
餘法用即張氏故址為養心堂以館學徒又捐錢千萬以
廣染盛之田是田也自夫子倡之今諸生之廩稍亦云備
矣子也昔嘗有諾于曹度兩卿盡踐言焉予嘗考周子
以慶厯四年司理南安年方三十程大夫珦謂其知道
時二程子年十五六遣從之游迨嘉祐五年僉書合州
判官年方四十宗範又從之今紬繹其養心說大抵與
通書聖學章相表裏秦漢以來諸儒臻斯理者蓋鮮鳴

呼何三子之立志不凡而聞道甚早與夫人生于兩間而與天地同體出乎百世之下而與聖賢同心使皆能以周子之說反而求之寡欲以養其心養心以極于無欲則是心之運明通公溥豈有一毫之私間之哉或曰聖賢之論言寡欲矣未嘗言無欲也所謂欲仁欲善欲立欲達莫非使人即欲以求諸道至於富貴所欲也有不可處已所不欲有不可施則又使人即其不欲以求諸非道歲積月累必至于從心所欲而自不踰矩然後


為至是理也曾子得之明六欲之目孟子傳之開六等之科今而曰自寡欲以至無欲不其戾乎曰不然也性不能無感性之欲也知誘物化則為私欲矣故聖人雖使人即欲以求道而于康子于由求于申枹曷嘗以其欲為可乎近世胡仁仲推行究極其言曰天理人欲同體而異用同行而異情嗚呼學者惟當以此求之則養心之說備矣姑識其說與學者商之

眉州江鄉館記

眉為西南孔道郡寢之西故有舍館以羸使客而遠於
大江舟行之人燥濕無所江有亭曰共飲僅容祖帳予
為拓而大之門堂戶室視昔苟美然左抗神宇右阻民
廬未能盡如初志也臨川李公甫某為守又為增拓焉
復故亭扁跨中唐為便坐前阿後翼左戶右牖明麗堅
緻飾以花木周以宮牆而移書某曰予也昉為此者盍
卒記之予嘗考五禮之說雖有見於虞書而孔注自為
抵牾至周官而吉凶軍賓嘉之目始見于經夫吉凶人

治之大者義廣而數繁固也而三百六十官職掌之關
乎賓客者七十有六天官所總實居十八蓋自司闕敝
闕以告司徒令野修道委積掌訝逆賓于疆於是共禮
酒共陳酒共稍禮共齊菹以至牢米法羊澤物幣齋各
庀其事司儀致館環人授館小行人眠館蓋無一而不
周當是時也不獨朝賓國客為然有委積焉甸聚焉以
待羈旅雖行道之人亦有廬有宿以舍之食之矣非古
人屑屑然為是不急之務也車馬有所賓從有代伯政

猶然故隸館以責晉興梁以議鄭里候以覘陳不曰道
路館舍之事而不足以為政也予恨是役不能盡如初
志而公甫能卒成之故予樂道其事不復以不詞為解



鶴山集卷四十四

欽定四庫全書

集部

鶴山集卷四十五至七

詳校官庶吉士臣張溥

主事臣呂雲棟覆勘

總校官檢討臣何思鈞

校對官編修臣莫瞻榮

謄錄監生臣毛大瀛

欽定四庫全書

鶴山集卷四十五

宋 魏了翁 撰

一記

寶謨閣直學士知潼川府贈太師劉清惠公祠

堂記

尚書郎劉全叟抵余以書曰先君清惠公早孤自奮紹
元祐家聲於黨禍流離之餘出入中外幾四十年晚守
潼川邦人德之不忍忘自郡及邑既象而祠之然未特

祠也端友不佞猥以寶章之直司臬東川邦人曰吾清惠之子也合辭以請乃土其地于郡北長平山築室三楹而厚祀之旁曰憩亭以傳于愛崇之義昔者為十縣代役有記蠲租有記蠲米麥之耗有記北山之祠二顧廟之祠中江縣之祠與郡庠之市田儲書亦皆有記子於先清惠匪惟同朝之舊且常刺部于斯守藩于斯今新廟之役考成而舊人之存無幾記載之筆必子是屬予謂公平生大節識于碑楹施于烝彝鼎

錄於太史氏議于奉常考功昭昭日星之垂矣以予言為
也矧惟郡縣吏所去見祠非萃渙立廟之意今祠之多
記之備而又以屬于不肖不已贅乎將辭諸使人復自
惟念古今異制郡國異宜固有遭時為法緣情制禮者
且古者裂五侯三土以與天子共守天下沒而奉祀則
有祝宗卜史典策分物祀于太宮宗氏分族共其職事
如懷姓九宗之於晉殷民六族之於魯蓋建邦啟宗世
襲其位則世祀其先也若卿大夫士爵祿有列于朝亦

得以其等殺立廟于家內賓宗婦昭穆以序皆不失乎
萃渙之意自許田立魯別廟而鄭人承祀強家分魯分
晉而各主其廟大非先王之舊戰國而後宗法廢絕廟
祀之不經久矣況自罷侯置守吏如傳舍才在下中者
苟容以求全而貪沓殘暴者民盼盼然疾視唯恐去之
不亟則民安知有故侯之祠苟幸而遇廉平之吏有德
于民民幸其有以福我也則非以選表召亦以終更去
吏民之愛戴者雖欲借留攀轅終為具文於是而度越

古典築館圖形以奉嘗其守宰亦人情之所不可已者
又慮其善政之無傳也為文以記之慮來者之去籍也
勒石以永之豈無尚德懷賢抑以廉頑儆貪茲其情不
既甚切而滋可矜者乎其間豈無出于驅迫本于諂佞
者然吏去則祠毀幸而勿毀則荒穢弗治徒取笑辱焉
此又所不論也惟清惠公以文獻故家發身科第清心
約已一介不忘取予御命朔庭威名折衝後以從臣守
荆正韓侂冑開邊姦人乘時造譽公首戮朱勝威行南

國仇胄憚之以公還蜀守漢中劾寮吏之從亂者守潼川拯民于焦土建鰥振滯已責蠲逋度地以居民發廩以振乏儲書以勸學市田以養士前後為費數鉅萬蠲失火之家貸緡十餘萬又為潼人請于朝永蠲米麥消耗歲為石三千七百八十最後又蠲諸邑田賦為緡八萬四千有奇蓋居郡五年苟以利民者無不為也嘗上疏乞身詔書報曰卿守荆江漢懷惠守梁梓巴蜀稱仁有臣如斯朕將褒表不暇顧欲引年而去可乎蓋遲留至

五年而後去然人情終弗慊也祠之多記之備非其情之不可已與其情之滋可矜者乎諸葛武侯之卒民巷祭野祀朝論以禮秩禁之不可卒使近墓立廟邦人思亮不置而愛其子瞻每朝廷有善政必曰此吾侯之子瞻所為也嗚呼鄭人思桓公而愛武公晉人思欒武子而愛桓子蜀人思諸葛公而愛瞻人之情至于愛而不見圖其形書其政猶以為未足也而移其愛於子孫雖以見斯民秉彝好德之性亦由化敎俗媮人幸於善人

之見故愛之切而思之深嗚呼全叟而登斯堂也睹斯義也知人情之望于我者若此其厚也其益知自勉以克休於前烈矣全叟嘗厯合龍普邛四郡守擢金部郎中由成都路提點刑獄移節潼川所居有善政其子震孫自通判隆慶府以方伯之薦召赴都堂審察清惠之報庶其在此云

壁津樓記

成都路刑獄使者吏部郎游景仁以書抵予曰伯之先

人嘉泰間守嘉即城之南瞰江跨堞而為樓焉陳益之
取水經語名以壁津後三十年侶以使事來而樓無以
存吾不忍考志之弗嗣也仍其名而復之基視舊加崇
樓之崇三于舊最下為堂曰寶忠以識先人易名之典
子既大書而揭之矣盍為記之雖然吾之為斯樓也匪
以為宴娛之供每一登臨憂感交集蓋未嘗有一忻焉
昔者張義立夷佛灘之險是矣第水勢自高臨下旦暮
齧城足傳城而居者廩廩然吾雖在寮吏盡力於匱瘠

且為支流以泄其怒而不保後來之我繼也樓之右三
峩衡陳其下中鎮諸柴實邇夷略險所弗及阻木以為
固而郊于是邦也今濯濯然吾雖誅犯令者而憲之禁
亦不保後來之皆我聽也蜀餉為粟百五十萬石仰西
州者居多歲待以稔惟都江通濟二堰而積蠹弗蠲歲
比不登吾雖廣思集益損其弊之十八今舳艫相銜登
樓目送三軍之士庶乎可飽抑又不保堰之久而勿替
也既又思之所憂有大于此者獄訟之不平陰陽以沴

今傳爰之不幸而訴於我吾不能盡心焉匿雖修如水
旱何職思其外則三垂之不戒寇盜以興雖一方之粗
定軍餉之無闕亦將慼慼而無所騁是乃范文正公所
謂進亦憂退亦憂者子將何以教我嗚呼予嘗以弘毅
為景仁發室今景仁之慮及此其庶幾無愧于斯二言
矣乎予嘗觀易六十四卦乾坤之次即為六坎其謂天
一生水而成于六乎剛柔始交而難生則聖人之憂患
實昉諸此蓋以一陽而陷乎二陰險也亦勞也既險且

勞聖人獨能忘情乎故乾坤既定即次以屯君子不可以不經綸也及其見諸經綸以濟險難則又以未濟終焉始乎屯終乎未濟君子無一息而不憂也景仁觀水之激則憂在城觀防之壞則憂在餉即天水之違行則憂在訟憂其可憂而又憂人之憂憂人之憂而又憂後人之不見憂也非弘毅者能之乎雖然人能憂人之憂而後能樂己之樂內有可樂則仁念發達可隨所往而不憂不則物足以勝我氣足以役志其不憂樂而樂憂

者幾希景仁之先人名某嘗主司農寺簿紹熙之末國
有大議自司農發之景仁不墜厥紹今端平改元天子
有詔召為郎從施諸事業有引未艾云益之名謙義立
名方

瀘州重修學記

瀘故有孔子廟在州郭之北唐咸亨所建也迨慶厯四
年詔州縣興學爰始除舍以羸生徒元祐五年徙廟學
于州南紹興中始置教授自崇寧訖嘉泰雖三厯繕修

然今既三十年矣其起家守瀘以故事謁先聖先師堂序若將墜焉則撤而新之前端門術後建齊寢左右列從祀位又念廟學不可混也更建東西序築師生之館于外尊壘爵洗故以梓今范金為之凡二百一十為有司製冕服諸生製衣幘役未既會某以君命名士曰公無一言以告我乎某對曰吾幼而學之孔孟之書也壯而欲行之率不與事儼今願竊有告焉且古者國子舍于王宮教于師氏而時會于大司樂以習誦弦以學樂

舞萬民居于此閭教于塾師而時屬於州序以受教法以
正齒位皆非常廩之士也自漢景時文翁為蜀郡守立學
官置左右生而郡國養士始此武帝立博士弟子員而大
學養士始此古者以有道有德者教國子父師少師教于
閭塾蓋禮所謂鄉先生國人所視為矜式者故于射飲則
為遵自鄉治廢而教法壞至新莽始于校學立經師繇是
相承有郡文學州博士之等迨我慶厯設教授之官始也
猶聽舉人自擇熙寧以後命于朝廷命于吏部則皆聽之

資格矣古者有養老乞言有旅酬合語蓋學校公論所出也自春秋至二漢此意尚存迨其後也規約日繁禁防日密至蔡京專國則憲禁申令如謗訕朝政如造為飛語皆坐首罰至于今未之改也雖然是特學制之變耳其如廟制則滋異昔聞古者祀祭享之別不相僭瀆未有非鬼非族而可以言廟不尸不獸不嘏不綏不旅不繹而可以言祭也魯哀公十七年立孔廟于故宅閔千餘載未嘗出闕里也漢儒所謂立學釋奠未知先聖先師為誰自載記之

外無聞焉迨魏齊王晉武帝釋奠于學雖昉見史冊而
未有原廟也唐武德二年廟周孔子冑監迨貞觀定為
孔子為先聖而黜周公於是牲牢器幣日增月益無異
廟祧之祀矣古者弟子之於師子孫之於父祖尊之而
無以加也則稱字以別之字之至貴漢初猶然而新莽
不知仲尼之為尊也妄為作謚然宣尼之云未敢削其
字也至追崇之典代增則以系諡為重王封為貴矣古
者惟功臣與享大烝未聞弟子從祀于師也自建武祠

七十二子于孔廟尚亦不出闕里也貞觀末加以左卜
諸儒從祀大學而武成王之祠亦倣而為之總章開元
以來又加諸儒以三等之爵而州縣學官咸有從祀矣
夫是數者孰非至隆極美之事乃肇自漢景武而盛於
魏晉齊梁隋唐以後然則五三之典非與易書詩春秋
不可信與借曰昔人未及聞知則美化善俗宜有以遠
過三代而民之淳漓世之治亂顧相反若此則又何在
大抵先王之時其人則四民也其居則六鄉三采五比

四閭也其田則一井二牧三屋九夫也其食則九穀六畜五牲三犧也其服則九文六采五色五章也其官則三吏六聯五侯九伯也其教則五事五典也其學則六德六行五禮六樂五御六射六事九數也民少而習之長而安焉不奪于奇器異物不僥于淫辭詖行不蕩于姦聲亂色族閭所學師友所講無適而非堯舜禹湯文武周公仲尼之道雖以周之叔季而車軌書文行倫莫之或異也自趙梁壞田制呂政燔詩書道失民散至

漢而不能復於是詖淫邪遁之言得以乘虛竊入始也
孔老離立久之而釋氏參焉蓋自天地山川日月星辰
雨風震電下至蟲鼃草木皆為宮室衣冠以肖人類府
史胥徒以象官府以至民之日用飲食車服器皿亦無
一而不改先王之舊舉世由之不以為疑也使于是時
又不為之建學立師示之以五三六經之準的則生民
之類幾何而不胥為禽也然則學盛而員廣廟隆而祀
繁其殆起于異端日熾大道寢微之時乎士復請曰記

學校者多矣而不及此亦曰生斯世也而必古制之是不其迂乎曰吾固知是古之無益而不可以末之間也千百年間習焉不察以郡縣之制視邦國以塔廟之儀曰庠序以梵唄之教釋聖言今日無益而末之間也是孰為有益乎乃次第其說勒諸學官以諗同志相與敷求墜典搜索遺言期紹昔聞開來哲為萬里建長治之策嗚呼其無有聞風而興起者乎

瀘州社倉養濟院義塚記

天運無窮物生不已人之性無不同也然而二氣雜糅
強弱異質短脩異數貴賤富貧異分所貴乎君公師長
者位乎兩間有以品節而左右之某自流南裔猩鬼與
鄰誠不自意生返故鄉起臨舊鎮益思所以布昭王靈
加惠遠服修校官增學廩創縣庠繕城郭植觀闕念民
困於科糴歲以四萬緡敷二萬斛前官雖嘗市田代輸
而行之僅二年乃以疆事之興粥田以佐用度此事中
廢予為出少府餘財斛增直二千雖然不惟小惠不可

徧也亦恐人心不能盡同行之久近未可知也又念城
內外士嘗合力創社倉于四隅以時糴糴為穀二千二
百五十斛然而舊沒新升之交細人未作昏暮得穀春
榆無所出緡錢萬有三千糴米千斛為倉廩于報恩佛
舍之西廡歲貯田租七十斛以備消耗一其槩量糴以
元直將以制物低昂也又慮社倉不能常糴乃與僚吏
躬視城南養濟院而增廣焉院始創于太府寺丞王公
大過有序有室有府有庖歲八千三百斛約其所入可

飽百人第歲久腴削所養視昔財半命復其數選吏覈實增置官田若干畝增養百人庶乎老且廢者有養疾且病者有療孤有幼者可以成人鰥寡者有告也則又慮死者無所歸也乃稽州之義冢自故相趙文定公創于真如寺之西偏旋以地隘不可更拓李侯寅仲又嘗更創于寺之南而男女混殽牛羊蹂踐過者顛泚乃為相地於使君崑下山從西北來襟抱環合廣深各二十丈出緡錢三十萬庾之甃石為穴凡無主之喪全而藏

之周以土塋飾以門衛分左右以別男女書年狀以待
子孫秩廩給以處守者亦撥田租十有三斛歲儲其入
於常平庫歲掩埋之命鄉之仕者傳朴李有之司其事
規置既成人曰吾侯之為是也節縮浮費凡四方之邦
交之幣獻不有其一錢以臻于是是不可以無記予愀
然曰是惡足記也古之為政壯有用老有歸幼有養矜
寡孤獨有秩瘠聾跛躄斷者侏儒有食其徒也相授死
也相葬不幸而道死也塋之無主後也里胥主之酖也

蜡氏除之盈天地間生事死送無一民弗得其所此君
公師長所以師保萬民之職分也今也不然簿書期會
之是務而區區然為小惠以悅民且社倉歲糶之數視
昔非不廣矣然生聚之蕃舟陸之會是果能為低昂乎
養濟之數視昔亦倍矣然老癯殘疾顛連亡告者亦能
無所遺乎患瑾死之不廣也為之行營高燥多其兆域
益其儲峙不知喪無主後行有死人亦止于是乎孝子
慈孫欲自致其誠敬者亦有以處之乎自聖賢視之直

不滿一笑尚足以為功乎姑識予恨以俟來者云

鶴山集卷四十五